

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-87/25
Sarajevo, 16.1.2025. godine

Z A P I S N I K

6. VANREDNE SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 16. i 31.1.2025. godine

Sjednica je počela sa radom u 12 sati i 35 minuta.

Sjednici je predsjedavao Tomislav Martinović, predsjedavajući Doma naroda Parlamenta Federacije Bosne i Hercegovine.

Predsjedavajući je pozdravio delegatkinje i delegate, predsjednicu Federacije Bosne i Hercegovine Lidiju Bradaru, potpredsjednike Federacije Igora Stojanovića i Refika Lendu, ministre u Vladi Federacije Bosne i Hercegovine, predstavnike međunarodnih organizacija i medijskih kuća koji prate rad sjednice.

Izostanak sa sjednice najavili su Tanja Šantić i Vesna Saradžić.

Prema evidenciji Stručne službe, sjednici prisustvuju 72 delegata, što čini većinu, pa Dom naroda može raditi i punovažno odlučivati.

Predsjedavajući je konstatovao da se neće postavljati delegatska pitanja i inicijative jer se radi o vanrednoj sjednici Doma naroda, te se prešlo na utvrđivanje dnevnog reda.

Muamer Zukić, predsjednik Kluba delegata bošnjačkog naroda, iznio je zaključak sa sjednice Kluba Bošnjaka da se tačka - Prijedlog Zakona o gasovodu „Južna interkonekcija Bosna i Hercegovina i Republika Hrvatska“ (predlagači: grupa delegatkinja i delegata u Domu naroda Parlamenta Federacije Bosne i Hercegovine) razmatra kao prva tačka dnevnog reda.

Predsjedavajući je zatim obavijestio delegate da je prijedlog Kolegija Doma naroda da se u dnevni red uvrsti i tačka - Nacrt Zakona o fiskalizaciji.

Damir Džeba, predsjednik Kluba delegata hrvatskog naroda, predložio je da dnevni red ostane isti kako ga je Kolegij i predložio.

U raspravi koja je uslijedila učestvovali su: Muamer Zukić, Haris Zahiragić, Damir Džeba, Aljoša Čampara, Oliver Soldo, Vibor Handžić i Tomislav Martinović.

Na osnovu rezultata glasanja, predsjedavajući je konstatovao da je Dom naroda, sa 51 glasom za, uz osam uzdržanih glasova i uz 11 glasova protiv, prihvatio da se Prijedlog Zakona o gasovodu „Južna interkonekcija Bosna i Hercegovina i Republika

Hrvatska“ (predlagači: grupa delegatkinja i delegata u Domu naroda Parlamenta Federacije Bosne i Hercegovine) razmatra po hitnom postupku.

Na osnovu rezultata glasanja, predsjedavajući je konstatovao da je Dom naroda, sa 50 glasova za, uz sedam uzdržanih glasova i uz 11 glasova protiv, prihvatio da se Prijedlog Zakona o gasovodu „Južna interkonekcija Bosna i Hercegovina i Republika Hrvatska“ (predlagači: grupa delegatkinja i delegata u Domu naroda Parlamenta Federacije Bosne i Hercegovine) razmatra kao druga tačka dnevnog reda.

Na osnovu rezultata glasanja, predsjedavajući je konstatovao da je Dom naroda, sa 47 glasova za, uz osam uzdržanih i uz 12 glasova protiv, prihvatio da se Nacrt Zakona o fiskalizaciji transakcija u Federaciji razmatra kao peta tačka dnevnog reda.

Na osnovu rezultata glasanja, predsjedavajući je konstatovao da je Dom naroda, sa 51 glasom za, uz 17 uzdržanih glasova i bez glasova protiv, usvojio sljedeći:

DNEVNI RED

1. Verifikacija mandata delegatkinji u Domu naroda Parlamenta Federacije Bosne i Hercegovine,
2. Prijedlog Zakona o gasovodu „Južna interkonekcija Bosna i Hercegovina i Republika Hrvatska“ (predlagači: grupa delegatkinja i delegata u Domu naroda Parlamenta Federacije Bosne i Hercegovine) – hitni postupak,
3. Izbor sudija Ustavnog suda Federacije Bosne i Hercegovine,
4. Prijedlog Zakona o jedinstvenim principima i okviru materijalne podrške licima sa invaliditetom u Federaciji Bosne i Hercegovine,
5. Nacrt zakona o fiskalizaciji transakcija u Federaciji Bosne i Hercegovine.

1. Verifikacija mandata delegatkinji u Domu naroda Parlamenta Federacije Bosne i Hercegovine

Delegatkinja Iva Raguž je izabrana za gradonačelnicu Grada Čapljine pa joj je na osnovu Izbornog zakona Bosne i Hercegovine prestao mandat delegatkinje u Domu naroda Parlamenta Federacije Bosne i Hercegovine.

Centralna izborna komisija Bosne i Hercegovine obavijestila je Dom naroda da je dodjelila mandat sljedećem kvalifikovanom kandidatu Ivani Buntić-Jovanović iz reda hrvatskog naroda iz Hercegovačko-neretvanskog kantona.

Mandatno-imunitetska komisija je razmatrala ovaj prijedlog i podnijela izvještaj koji je obrazložio Ivan Ivić.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 67 glasa za, bez uzdržanih glasova i bez glasova protiv, usvojio izvještaj Mandatno-imunitetske komisije vezano uz dodjelu mandata Ivani Buntić-Jovanović.

Nakon što je položila svečanu zakletvu, predsjedavajući je saopštio delegatima da je na osnovu člana 260. Poslovnika o radu Doma naroda, nakon verifikacije i davanja zakletve Ivana Buntić-Jovanović stekla prava i dužnost delegatkinje u Domu naroda Parlamenta Federacije Bosne i Hercegovine.

2. Prijedlog Zakona o gasovodu „Južna interkonekcija Bosna i Hercegovina i Republika Hrvatska“ (predlagači: grupa delegatkinja i delegata u Domu naroda Parlamenta Federacije Bosne i Hercegovine) – hitni postupak

Tekst Zakona je utvrdila grupa delegata i delegatkinja u Domu naroda.

Predstavnički dom obavijestio je Dom naroda da je na 15. sjednici, održanoj 12.12.2024. godine, usvojio Prijedlog Zakona o gasovodu „Južna interkonekcija Bosna i Hercegovina i Republika Hrvatska“, koji je predložio Klub zastupnika SDA sa sedam amandmana koje je predlagač prihvatio pa su postali sastavni dio Prijedloga Zakona. Tom prilikom usvojen je i Zaključak. Tekst Prijedloga Zakona istovjetan je tekstu Zakona usvojenog u Predstavničkom domu.

Prijedlog Zakona razmatrala su nadležna radna tijela.

Prijedlog Zakona obrazložio je Muamer Zukić, predsjednik Kluba delegata bošnjačkog naroda.

Damir Džeba, predsjednik Kluba delegata hrvatskog naroda, i Haris Zahiragić, predsjednik Zakonodavno-pravne komisije, obrazložili su svoje izvještaje.

U raspravi su učestvovali: Damir Džeba, Haris Zahiragić, Muamer Zukić, Ilija Nakić, Vildana Bešlija, Ivo Šimunović, Oliver Soldo, Aida Obuća, Emir Dautović, Ivan Ivić, Vedrana Vujović, Vibor Handžić, Sanela Klarić, Ivan Odak, Tomislav Martinović, Dragan Konta i Vedran Lakić.

Delegat Damir Džeba zatražio je pauzu 15 minuta prije izjašnjavanja.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 51 glasom za, uz četiri uzdržana glasa i uz 14 glasova protiv, usvojio Prijedlog Zakona o gasovodu „Južna interkonekcija Bosna i Hercegovina i Republika Hrvatska“.

3. Izbor sudija Ustavnog suda Federacije Bosne i Hercegovine

Dom naroda je u obavezi izabrati dvojicu sudija Ustavnog suda Federacije Bosne i Hercegovine sa dvije liste koje je dostavilo Visoko sudsko i tužilačko vijeće Bosne i Hercegovine.

Christian Schmidt, visoki predstavnik u Bosni i Hercegovini, dostavio je Domu naroda pismo od 20.12.2024. godine kojim zahtjeva da se izabere sudija Ustavnog suda Federacije Bosne i Hercegovine umjesto sutkinje Kate Senjak, koja je u januaru 2023. godine navršila 70 godina.

Visoki predstavnik je u pismu naveo da on očekuje da će ovaj dom imenovati sudiju, odnosno sutkinju do 20.1.2025. godine. Predsjedavajući je pismom od 23.12.2024. godine zatražio od predsjednice Federacije informaciju u vezi sa imenovanjem sudija Ustavnog suda Federacije.

Na osnovu Liste rangiranih kandidata iz 2022. godine predsjednik Federacije Bosne i Hercegovine u prošlom mandatu nije donio usaglašenu odluku o imenovanju sudija Ustavnog suda kako bi se popunile upražnjene sudačke pozicije. Predsjednica Federacije je uz ovu obavijest dostavila važeću rang.listu VSTVBiH s Mišljenjem Ustavnog suda Federacije Bosne i Hercegovine.

Predsjednica Federacije Bosne i Hercegovine je donijela Odluku o izboru sudija Ustavnog suda Federacije Bosne i Hercegovine na koju nije dobila saglasnost oba potpredsjednika Federacije Bosne i Hercegovine. Uz ovu odluku predsjednica Federacije je dostavila Listu kandidata na osnovu konkursa iz 2024. godine sa njihovim biografijama. Prema ovom konkursu, a na osnovu Mišljenja Ustavnog suda Federacije Bosne i Hercegovine koji je priložen uz Listu kandidata, trebao bi se potvrditi sudac iz reda srpskog naroda.

Imajući u vidu dostavljenu informaciju sa dokumentacijom od Ustavom ovlaštene institucije stekli su se uvjeti za izbor sudaca na osnovu Amandmana CXXIII. na Ustav Federacije BiH, odnosno stava (4) navedenog amandmana.

U Odluci Visokog predstavnika od 2.10.2022. godine u drugom dijelu Odluke naveo je da nisu potrebna dodatna tumačenja ili propisi u vezi sa primjenom CXXIII. Amandmana na Ustav Federacije Bosne i Hercegovine.

Glasanjem za sudije Ustavnog suda Federacije Bosne i Hercegovine iz reda hrvatskog i srpskog naroda nacionalna struktura u Ustavnom sudu Federacije Bosne i Hercegovine ostat će nepromijenjena i na ovaj način osigurat će se potpuno funkcioniranje Ustavnog suda Federacije Bosne i Hercegovine i Vijeća za zaštitu vitalnog interesa u Ustavnom sudu Federacije Bosne i Hercegovine.

Amandman CXXIII. stav (4) na Ustav Federacije Bosne i Hercegovine glasi:

„(4) Ako predsjednik, uz saglasnost potpredsjednika ne predloži kandidate za sva upražnjena mjesta u roku 30 dana od dana kada je Visoko sudsko i tužilačko vijeće Bosne i Hercegovine dostavilo listu ili od dana glasanja kada je Dom naroda odbio potvrditi kandidate predložene u skladu sa stavom (2) ovog člana, Dom naroda većinom glasova prisutnih delegata odlučuje o potvrđivanju najviše rangiranog kandidata iz reda relevantnog konstitutivnog naroda ili iz reda ostalih s liste koju je dostavilo Visoko sudsko i tužilačko vijeće Bosne i Hercegovine. Ako kandidat ne

dobije potrebnu većinu, Dom naroda odlučuje o drugim kandidatima iz reda potrebnog konstitutivnog naroda ili iz reda ostalih prema redoslijedu na rang-listi koju je dostavilo Visoko sudsko i tužilačko vijeće Bosne i Hercegovine. Ovaj postupak će se ponavljati sve dok se sva upražnjena mjesta ne popune. Ako na listi kandidata ne ostane nijedan sudija iz reda potrebnog konstitutivnog naroda ili iz reda ostalih, Visoko sudsko i tužilačko vijeće Bosne i Hercegovine dostavlja novu listu kandidata.”.

Komisija za izbor i imenovanja Doma naroda razmatrala je Odluku predsjednice Federacije i priloženu dokumentaciju.

Stav Komisije za izbor i imenovanje obrazložio je njen predsjednik Milan Ševo.

Muamer Zukić, predsjednik Kluba delegata bošnjačkog naroda, zatražio je pauzu 30 minuta prije zaključenja rasprave.

U raspravi su učestvovali: Aljoša Čampara, Tomislav Martinović, Muamer Zukić, Haris Zahiragić, Vedrana Vujović, Vibor Handžić, Damir Džeba, Nezim Alagić i Oliver Soldo.

Predsjedavajući Doma naroda Tomislav Martinović dao je pauzu 45 minuta.

Nakon pauze, predsjedavajući je obavjestio delegate da je stav Kolegija Doma naroda da se sjednica prekine.

Sjednica je prekinula rad u 20 sati i 27 minuta.

NASTAVAK 6. VANREDNE SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 31.1.2025. godine

Sjednica je počela sa radom u 19 sati i 4 minute.

Predsjedavajući je konstatovao da se okončala rasprava u vezi sa 3. tačkom - Izbor sudija Ustavnog suda Federacije Bosne i Hercegovine - te je potrebno da se u skladu sa Ustavom Federacije Bosne i Hercegovine i amandmanima na Ustav izjasni o sudijama o kojima je potrebno glasati.

Muamer Zukić, predsjednik Kluba delegata bošnjačkog naroda, i delegat Haris Zahiragić su zatražili pauzu sat vremena.

Nakon pauze uslijedila je rasprava u vezi sa održavanjem nastavka sjednice u kojoj su učestvovali: Muamer Zukić, Haris Zahiragić, Tomislav Martinović, Aljoša Čampara, Emir Dautović, Vedrana Vujović, Albin Zuhrić, Damir Džeba, Ljubinka Atanasijević i Ivan Odak.

Nakon rasprave, predsjedavajući je dao pauzu 10 minuta.

Nakon pauze, prešlo se na 4. tačku dnevnog reda.

4. Prijedlog Zakona o jedinstvenim principima i okviru materijalne podrške licima sa invaliditetom u Federaciji Bosne i Hercegovine

Prijedlog Zakona utvrdila je Vlada Federacije.

Predstavnički dom Parlamenta Federacije Bosne i Hercegovine obavijestio je Dom naroda da je na 14. sjednici, održanoj 22. i 23.10.2024. godine, usvojio Prijedlog Zakona o jedinstvenim principima i okviru materijalne podrške licima sa invaliditetom u Federaciji Bosne i Hercegovine sa jednim amandmanom koji je Vlada Federacije prihvatila pa je postao sastavni dio Prijedloga Zakona.

Na Prijedlog Zakona tri amandmana podnijela je delegatkinja Sandra Imširović.

Amandmani su dostavljeni Vladi Federacije radi izjašnjenja.

Vlada Federacije dostavila je izjašnjenje kojim ne prihvata amandmane delegatkinje Sandre Imširović.

Prijedlog Zakona obrazložio je Adnan Delić, ministar Federalnog ministarstva rada i socijalne politike.

U raspravi je učestvovala Silva Banović.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 47 glasova za, bez uzdržanih i bez glasova protiv, usvojio Prijedlog Zakona o jedinstvenim principima i okviru materijalne podrške licima sa invaliditetom u Federaciji Bosne i Hercegovine.

5. Nacrt Zakona o fiskalizaciji transakcija u Federaciji Bosne i Hercegovine

Nacrt Zakona utvrdila je Vlada Federacije.

Predstavnički dom Parlamenta Federacije Bosne i Hercegovine obavijestio je Dom naroda Parlamenta Federacije da je na 15. sjednici, održanoj 4.12.2024. godine, razmatrao Nacrt akona o fiskalizaciji transakcija u Federaciji Bosne i Hercegovine i Zaključkom ga prihvatio. Tom prilikom Nacrt Zakona upućen je u javnu raspravu.

U raspravi je učestvovao Damir Džeba.

Na osnovu rezultata glasanja, predsjedavajući je konstatovao da je Dom naroda, sa 47 glasova za, bez uzdržanih i bez glasova protiv, prihvatio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o fiskalizaciji transakcija u Federaciji Bosne i Hercegovine i smatra da može poslužiti kao osnov za izradu prijedloga Zakona.
2. Zadužuje se predlagač da organizira i provede javnu raspravu od 90 dana.
3. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije iznesene u raspravi na sjednici Doma naroda, javnoj raspravi kao i one koje su dostavljene ili će biti dostavljene u pisanoj formi.

Predsjedavajući je dao pauzu 10 minuta.

Nakon pauze, predsjedavajući je obavijestio delegate da ostavlja otvoreno pitanje u vezi sa tačkom - Izbor sudija Ustavnog suda Federacije Bosne i Hercegovine - i prekida rad ove sjednice.

Sjednica je završila s radom u 21 sat i 43 minuta.

Smatra se da je 6. vanredna sjednica završena time što je okončano glasanje o izboru sudija Ustavnog suda Federacije Bosne i Hercegovine na 18. redovnoj sjednici Doma naroda Parlamenta Federacije Bosne i Hercegovine.

Transkript sjednice čini sastavni dio Zapisnika.

DRŽAVNA SLUŽBENICA KOJA OBAVLJA
POSLOVE IZ NADLEŽNOSTI SEKRETARA
DOMA NARODA

Aida Hadžić-Salkić

PREDSJEDAVAJUĆI

Tomislav Martinović